

欽定大清會典事例

欽定大清會典事例卷一百六十七

戶部

田賦開墾二

嘉慶四年

諭奉天旗民私墾餘地為日已久。自應清查辦理。以杜爭端。著賞限二年。令各業戶將浮多地畝自行首報。其從前私種之罪。及地方官失察處分。俱著加恩寬免。向來納租餘地。每畝交銀六分。今著加恩減半。每畝酌中納租三分。折交錢文。自於旗民生計為便。如有逾限隱匿不首者。准令地鄰人等首報。丈出餘地。

即撥給首告之人耕種納租該將軍等務須督飭所屬實力詳查。儻吏胥等有藉端勒索影射等弊必當嚴行治罪。○五年奉

旨。郭爾羅斯蒙古游牧處所不准內地民人踰界前往開墾。惟因蒙古等不安游牧。招民墾種事閱多年。相安已久。且蒙古得收租銀於生計亦有裨益。是以仍令其照舊耕種納租。此係朕體恤蒙古起見。方今中外一家。普天莫非王土。但蒙古向來游牧之地。既許內地民人墾種。若復官為徵收。竟似利其租入。豈朕愛養蒙古之意。今軍機大臣等議令設官彈壓。不令

經徵並不准照吉林地丁收租所議甚是仍令查勘酌定租數俾蒙古民人兩有裨益以副朕一視同仁至意欽此遵

旨議定查明該處共熟地二十六萬五千六百四十八畝按每畝徵糧四升共折銀五千五百七十八兩六錢札薩克自向民人徵收以後不准多開一畝之地添往一戶之民如有私招民人偷開地畝者從重治罪○又覆准從前甯古塔地十二佐領及驛站官莊地二萬七千四百八十六畝五分每年應徵銀九百餘兩年來生齒日繁

又值連年霜雹旗人無力耕種之地甚多內未經拋荒地八千二百九十二畝五分仍留該兵為業已拋荒地一萬九千一百九十四畝給民耕種俾課項有著旗人不致受無地之累但小民初墾備辦牛具籽種勢難納賦俟明年秋後升科經此次調劑之後或旗兵漸見豐饒民人或不耕種仍隨時奏請撥歸旗兵以符舊制○又覆准浙江被水田地有沙淤石壓者勸民設法墾復照江西之例每畝給修費銀二錢水衝田禾每畝給籽種銀一錢令其及早墾復如有

不肖官吏藉端捏報指名嚴叅○又議准嗣後奉天旗民人等隱種餘地令隨時呈報地方官於秋末春初親詣查勘造冊送部仍自查辦之年起每畝徵租三分所首紅冊地旁滋開之地仍作為私產售賣聽其自便其另段私開及納租餘地邊開出之地一體首報入官仍交原佃承種如無力耕種另行召佃不准私相授受如逾二年之限不行自首者准地鄰首告即屬私地亦令官為召佃依山傍水餘地不成坵段者免其升科○又奏准

盛京查出各城旗可墾馬廠地三十八萬九千八百七十四畝。聽各城旗開墾，不准另招旗民墾種。仍按開墾年分，據實報部起科。每畝徵銀四分。嗣後該處地畝升科，如係自行首報者，均著每畝徵銀三分。係查出者，均著每畝徵銀四分。○九年奏准黑龍江所屬齊齊哈爾、愛琿、墨爾根、公田耕種甲兵，今改設養育兵，同齊齊哈爾原撥水師營水手，俱令耕種。每名歲交額糧十二石。其新種公田各丁開墾伊始，每名給籽種二石。當年減半交糧，次年按額滿交。○道光

五年奏准。嗣後京旗出賣東三省地畝。如有冊地邊滋生餘地。於出賣時酌留一半。如有另段納租餘地。於退領時酌留一半。如二項兼有。總以地數多者為率。相等者從一酌留。仍令領種之僕人莊頭承攬。其有爭租奪佃者。仍照舊例辦理。○七年奏准。黔省種山棚戶。止許各種舊墾熟地。不准再招外來游民開墾。多占儻有增添棚戶。墾占苗地。將招引之人。及該寨頭嚴行懲治。其鄰境客苗來寨租土開墾。與漢佃互相援結。欺侮土著愚苗者。亦一律懲辦。○十五年

諭蒙古地方遼闊以騎射游牧為本務向例不准口內
居住旗民在蒙古地方開墾其種地貿易民人前經
各該旗呈報驅逐歷經辦理有案此項地畝若仍令
招民墾種行之日久難保不多開私墾有礙游牧致
妨蒙古生計轉非覈實體恤之意所請照舊墾復之
處著不准行○十六年奏准湖南省永明縣塘下源
白雲沖雷洞源上木源各處封禁山場責成地
方文武員弁按時巡查嚴禁民徭私墾違者照
強占官山律治罪員弁參處○十九年陝西武
功縣開墾八旗馬廠地三百八十畝有奇照例

升科○又江蘇婁縣開墾草蕩地九十畝有奇
照例升科○又浙江仁和場開墾竈地三百五
十一畝有奇照例升科○又福建侯官縣開墾
地十六畝有奇照例升科○二十四年

諭前因御史舒明阿奏請通查各省荒地降旨令戶部
議奏茲據奏稱各省未經報部各荒地有無私墾隱
賦殊難懸定著各直省督撫府尹都統悉心體察將
所有荒地覈實查明是否可以招買均以有無情願
認買之人為斷如辦有大概情形即著先行據實覆
奏至有人承買荒地著該督撫府尹都統酌量定價

收解部庫仍將每年收納糧額覈定報部造冊其無人認買各地應俟承買有人隨時辦理仍催令照例升科毋許延宕○二十五年直隸平山縣開墾地五十六畝有奇照例升科○又廣西天保縣開墾地十三埧有奇照例升科○又江西廣豐縣開墾田一項十六畝有奇照例升科○又江西鉛山縣開墾田二十畝照例升科○二十六年議准烏魯木齊鎮西府所屬宜禾奇台二縣開墾地二萬四千五百六十九畝迪化州及所屬昌吉阜康綏來濟木薩呼圖壁六處開墾地四萬

五千六百畝噶遜所屬柴節博一帶開墾地三千一百五十畝庫爾喀喇烏蘇所屬奎屯等處開墾地一萬零一百一十畝精河所屬托托克台等處開墾地三千零九十畝共十一處開墾地八萬六千五百一十九畝令該都統察看情形俟試種二年之後果能收穫豐盈仍照各屬正額升科毋庸議減以符定則○又廣西天保縣開墾田十一畝照例升科○又浙江仁和場開墾沙蕩灘田五百三十七畝有奇照例升科○又直隸甯晉縣開墾荒地一百七頃五十畝

有奇照例升科。○又浙江富陽武康樂清三縣開墾沙地塗田六頃七十三畝有奇照例升科。○又烏魯木齊所屬塔西河蘆草溝等處開墾田地十六頃八十畝照例升科。○又陝西武功縣開墾馬廠餘地三十三頃四十六畝有奇照例升科。○二十七年

諭前據經額布等奏封禁硃爾山等處閒荒地畝議立稽查章程當交戶部議奏茲據該部逐案查覈詳議具奏所有該處閒荒地畝經此次勘定後即依部議責成該將軍分別責成副都統及各處協領等遵照

辦理統於年終由該將軍查明有無私墾據實具奏
該將軍務須諄切曉諭各員認真稽查實力奉行不
得視為具文日久生懈儻仍玩泄致有流民闖入潛
匿偷墾等弊一經發覺即將該將軍交部嚴加議處
所有該管副都統及派查各員並總管協領等官即
行革職言出法隨決不寬貸懍之慎之○又陝西興
平盤屋武功三縣開墾廠地六十五頃四畝有
奇照例升科○又福建古田縣新墾旱田五十
四畝照例升科○又廣西天保縣開墾水田八
埜一伯照例升科○又浙江富陽縣開墾地九

十四畝有奇象山縣二百六十六畝有奇定海廳七頃二畝有奇樂清縣三百三畝有奇瑞安縣一十四畝有奇各照例升科。○咸豐元年浙江定海廳屬開墾蕩田十六畝有奇照例升科。○又熱河承德府屬墾種荒地五十二頃三十畝有奇照例升科。○七年

諭慶祺等奏大凌河馬廠開墾地畝擬請升科一摺奉天錦州府屬大凌河東岸原准試墾既據該將軍等查明實係牧馬不到之區有界濠為限舊制昭然兩無妨礙與其久曠地利徒使姦民偷種致啟爭鬪之

端不如概行入官一律升科著照所請准令錦州所屬八旗五邊四路甲兵及牧羣衙門牧丁掣籤分領仍令原佃租種照例升科責成地方官妥為經辦○

十年

諭景瀆麟瑞奏請開荒濟用一摺據稱查得吉林地方涼水泉南界舒蘭迤北土門子一帶禁荒約可墾地十萬晌省西圍場邊約可墾地八萬餘晌阿勒楚喀迤東蜚克圖站約可墾荒八萬餘晌雙城堡贖存園荒及恆產夾界邊荒可墾地四萬餘晌均經委員履勘地屬平坦別無違礙現有佃民王永祥等認領先

交押租錢共二十餘萬吊於將來查辦邊界一切船糧車馱經費可資備辦請將前項各荒一律招墾即以押租借給查界之費餘則悉數解京俟領種五年後再將升科錢文接濟京餉等語吉林荒地既可援案招墾別無違礙於經費不無裨益著即按照所奏辦理仍著照舊章先取押租俟五年後升科惟事屬經始務須辦理妥協並隨時嚴查以多報少情弊其押租作為查界經費外餘贖錢文及以後升科錢文毋庸解京即著據實奏報抵充該省官兵俸餉以省往來運解之煩○同治元年議准湖北荊州旗營馬

廠開墾地二萬二千一百三十一畝一釐九毫
每年徵租銀三千五百四十三兩零由荊州府
會同理事同知督率各該縣徵解荊州府轉解
將軍衙門支放新增防兵月餉贏餘存留旗庫
遇閏兵餉並補給荒歉租項○二年

諭瑞麟奏請開墾圍場閒地以資接濟一摺熱河駐防
旗兵所需俸餉因庫款支絀未能按月支放自係實
在情形所籌招佃展墾荒地以濟兵食自屬可行著
照該都統所擬將圍場四面邊界荒地八千餘頃展
出開墾其押荒升課章程即著妥議具奏所有此項

荒地著召募家計殷實素業稼穡之人具呈認墾不准濫招無業游民致滋流弊尤須畫清界址不准越墾以息爭端其與民地毗連者並當禁止侵占方可日久相安紅椿以外前墾兵租地畝歷年較久越墾成熟之地竟至數百頃之多著勘定界址安設卡倫以杜侵越之弊○又

諭烏魯木齊牧馬廠地土脈肥饒地面寬曠現經平瑞將該處閒曠地畝招戶開墾升科並將古城濟木薩瑪納斯等處孳生馬廠歸併巴里坤廠內騰出地畝一併開墾升科以充兵餉實係經久良圖自應實力

經營以裕經費。所有清釐段落界限。彈壓稽查。及豫防拋荒。拖欠等弊。均著該都統督飭員弁。詳慎辦理。

○又

諭直隸自天津迤東至新城一帶。海河兩岸水田。日久荒蕪。經僧格林沁等捐貲開墾。現屆三年。辦有成效。此項水田。嗣後即著歸直隸總督派員經理。自行報部。以歸簡易。而昭覈實。○三年

諭哈密地方。籌辦開墾地畝。經文祥先赴東路塔爾納沁。蔡巴什湖兩處查勘。除原額屯地外。沁屯共得荒地五千六百六十畝。蔡屯共得荒地一千七百餘畝。

均可開墾。其西路一帶查有蕭爾齊火石鐵岡茨梅花湖三段荒地均皆肥沃。擬將北山五道溝水源開渠引水澆灌。該回子郡王伯錫爾現願自雇夫工。捐備口糧木料。設法開挖渠道。著文祥即會同伯錫爾妥籌商辦。○又

諭。前據景綸麟瑞奏查明覆勘圍場邊荒情形。當經諭令該部查議具奏。茲據戶部奏該將軍等原奏內稱東由伊勒們河起西至伊通河止。並其間裁撤伊巴丹等五處廢圍除留建公所外。淨可墾地二萬八千六百六十五晌。又東自廟嶺起至一座毛地方。復由

該處南面折至迤西之釣魚臺止。西以伊勒們河為界。北以舊設卡堆為界。並其間裁撤之孤拉庫等二處廢圍。除留建公所外。淨可墾地八千二百三晌五畝。此項地畝。既據該將軍等查明。並無關礙情形。應請飭令照辦等語。著景綸麟瑞督飭承辦各員認真經理。仍隨時稽察。毋任偷種私占。亦不得藉端滋擾。致累閭閻。○四年

諭。麒慶奏接辦墾荒事宜。酌改章程。並熟荒升課情形。各摺片。圍場荒地除業經放出之一千四百九十二頃餘畝。按照原定章程徵收租課外。其左翼正黃正

紅二旗原勘荒地五千五百餘頃現據該都統查明多係山谿林麓實勘不足三千頃且地瘠天寒收成歉薄擬照下則徵收章程分別等差折減勘放著即照所議辦理其已墾熟荒地畝二百七十餘頃即著自三年為始責令該佃戶一律升課按限完齊毋任延抗○又

諭萬青藜卞寶第奏官荒地畝擬試墾水田請飭議籌辦一摺據稱甯河縣與天津縣交界地方有荒地六七十里曠無居人地力廢棄可惜查甯河等縣所屬塌河淀軍糧城等處濱臨海河若引水灌溉可開稻

田一千餘頃。歲可收稻米十數萬石。於北地倉儲。近畿民食。均有裨益。請飭侍郎崇厚派員履勘。會議章程。請旨辦理等語。咸豐年間。科爾沁親王僧格林沁。在大沽海口一帶興辦水田。倡捐辦理。得稻田四千二百餘畝。嗣經崇厚督員經理。使斥鹵之區。成為沃壤。民利賴之。今甯河天津交界地方。查有荒地數十里。經卞寶第函致崇厚。詢訪情形。並據該侍郎覆稱。軍糧城一帶。臨傍海河。但須開渠二道。官為籌款。招佃墾種。可得稻田千餘頃。該侍郎連年在鹽水沽一帶勸墾水田。收穫頗豐。自必確有把握。即著崇厚派

委妥員會同地方官前赴軍糧城一帶履勘情形酌議章程會同順天府府尹直隸總督奏明請旨辦理

○五年

諭前據萬青黎卞寶第奏官荒地畝擬試墾水田當經諭令崇厚會同順天府直隸總督派員履勘茲據萬青黎等勘明海河北岸自邢家沽起至臥河邨止開濬環渠中開洩水渠一道渠旁兩岸可開墾稻地五百餘頃計需渠工約銀八千數百兩此項銀兩准由崇厚借款興辦即著督飭委員招戶認墾將酌定章程及應行事宜認真經理一俟辦有成效仍當將附

近一帶荒地次第開墾以興地利而裕民生○又定陝西墾荒章程一正經界叛絕各產劃分段落編立字號客民應募者查明來歷給照承種一○定限制叛產概令入官絕產以三年為期業主逾期不返即行截止客民認墾者期至六年租糧及額即為永業一緩錢糧水田初年免租止納正糧旱田租糧俱免次年再升科一定租穀每畝每年約取租穀六年後統免租穀照額輸糧○又

諭曾國藩奏查辦湖團分別留遣並酌籌善後事宜一

摺據稱江蘇銅沛兩縣濱湖田畝前於咸豐元年間因黃河豐工決口時被水淹沒嗣因黃水退涸變為荒田經前任南河河道總督庚長設立湖田局招墾繳價輸租充餉山東曹濟等屬各縣客民遂陸續前赴該處創立湖團相率墾種屯聚日多銅沛土民於水退歸鄉後因舊時田產被客民所墾日相控鬪疊釀巨案並有刁劣生監設局斂錢屢以湖團遞捻謀逆等詞誣控希圖將客民概行驅逐現經訊明分別良莠辦理所辦甚屬允協銅沛等縣土民田產因被客民占墾控鬪不休固出於情之不得已惟當地方

官立局招墾時該處土民並不呈請認還舊產迨客民出貲認墾變荒為熟始行爭控亦無以服客民之心且所墾之田亦有官荒地畝土民被占田產並無如許之多其聚眾構訟者亦非田產被占之戶現經曾國藩查明將上年容留捻匪之刁王兩團客民驅回山東本籍所有該兩團退出田畝六百五十餘頃抵還侵占之數計已有贏無絀凡有印契糧票之失業土著各戶均准其報官認種以昭平允其餘安分各良團均不得概行驅逐所墾地畝均准其永為世業該處土民不得再行爭控○八年

諭慶春奏查明熱河開荒漸侵正圍酌擬章程一摺前
因熱河圍場地多閒曠經前任都統瑞麟慶先後
分別科則招佃展墾乃日久展放漫無限制以致侵
占正圍自應查明禁止所有鑲白旗伊遜川開墾荒
地即著照舊有大卡倫為界其河東河西佃墾私墾
地畝均著飭令一律封禁並著嚴檄該總管等督修
卡倫建立紅椿毋令任意展墾○九年安徽桐城縣
歷年開墾熟田三千三十餘頃均照例升科○
又奏准吉林續開圍場荒地二萬晌除照章扣
除三成房圍井道外共應升科地一萬四千晌

自同治八年起限。至同治十三年限滿徵租。○
十一年咨准直隸順義懷柔昌平香河平谷樂
亭等州縣墾荒地畝。截至同治十一年止。共升
科地四百五十五頃五十三畝八分九釐七毫。
○又咨准直隸大興宛平永清香河昌平寶坻
房山等州縣呈報無糧黑地。截至同治十一年
止。共升科地八百四頃十四畝九分四釐一毫。
○光緒元年

諭福建臺灣全島自隸版圖以來。因後山各番社習
俗異宜。曾禁內地民人渡臺及私入番境。以杜滋

生事端。現經沈葆楨等將後山地面設法開闢。曠土亟須招墾。一切規制自應因時變通。所有從前不准內地民人渡臺各例禁著悉與開除。其販買鐵竹兩項著一律弛禁。以廣招徠。○又

諭。前據崇實等奏奉省大東溝現辦善後情形一摺。當有旨令該部議奏。嗣後據崇實等奏稱升科一節。請先明降諭旨等語。流民私種邊地例禁甚嚴。惟既墾荒成熟。從前亦曾奉

旨允准徵租。現在該處地畝小民開墾多年。樂輸租稅。朝廷恩施格外。原可寬其既往。以遂民生。所有大

東溝一帶已熟地畝著准其一律升科無論旗民
凡任地開墾者一體編入戶口冊籍即著崇實等
督飭委員將一切事宜妥為經理務使各安本業
毋任滋生事端用副子惠閭閻至意○四年奏准
福陵舊有窯柴官甸除溝河沙灘不堪耕種外其餘可
耕之地共文明三千餘畝賞給衆丁自行開種
以資採買窯柴燒造甓瓦之用○八年奏准直
隸張獨多三廳所屬各旗報墾官荒場地八千
九百六十餘頃分別年限給照升科此外游牧
地方有無已墾之地劃清界限禁止蒙民私相

放墾以符定制○十年

諭圍場重地。關係緊要。豈容率請開墾。著該將軍等。即將奉天大圍場地畝。永遠嚴行封禁。嗣後如有希圖漁利。赴部具呈捏詞請領者。即著該部解交奉天訊明治罪。以肅禁令。○十一年

諭墾荒地畝。自以招集流亡業歸土著為最善。如有客民承種情事。亦應分析查明。持平妥辦。以息爭端。○十二年

諭衛榮光奏。清釐荒熟田地。擬辦情形一摺。所稱江蘇各廳州縣。新墾田畝。現已逐漸加增。而胥吏之

舞弊紳衿之影射實所難免。該撫現擬於實荒者認真釐剔。隱匿者勒令報完。即著督飭司道實心經理。毋得徒託空言。○又奏准陝西甘肅山西等省荒地甚多。應由地方官設法報墾。並准客民承種。另編保甲。○又奏准直隸東淀久被侵種。以致上游各河水難下洩。泛濫為災。現委員紳胥胝經營。歷時五年之久。使全淀水道不為湮沒。查出該淀及靜海南北泊無糧地一千一百餘頃。歲可得治淀經費二千九百餘兩。洵於除害中兼能興利。○十四年奏准吉林原納租地

六十四萬五千零五十八晌七畝四分零三毫。現丈出浮地二十四萬三千二百零九晌零二分一釐七毫。撥補荒地二百九十九晌五畝六分。統計原浮撥補共地八十八萬八千五百六十七晌三畝二分八釐。○又奏准賓州瑪延河敦化縣伊通河南圍荒等三處共放熟地七千七百八十晌零零四分。又放出生荒地內現已墾成熟地一萬四千三百三十七晌三畝一分。未墾生荒地二萬八千六百五十六晌零七分。又續放出生荒地七萬一千六百二十七晌。

四畝七分統計熟地生荒共地十二萬四百晌
零零八畝九分○十五年咨准嗣後有旗地之
通州三河武清寶坻薊州香河甯河霸州保定
文安大城固安永清東安大興宛平良鄉房山
涿州昌平順義懷柔密雲平谷灤州盧龍遷安
撫甯昌黎樂亭臨榆清苑滿城安肅定興新城
唐縣博野望都容城完縣蠡縣雄縣安州高陽
河間獻縣阜城肅甯任邱交河景州故城吳橋
天津青縣靜海滄州南皮鹽山延慶保安蔚州
宣化萬全懷安赤城懷來遵化豐潤玉田昌州

涑水等七十三州縣咨報荒地如有除糧案據者即係民荒由井田科付送福建司按原除糧額分別上中下三等議徵歸入地糧項下附冊造報若無除糧案據者即係官荒旗荒由井田科覈辦歸於旗租公產奏銷案內造報其餘無旗地之州縣報墾荒地均由福建司分別有除糧案據者謂之民荒照原除糧額升科無除糧案據者謂之官荒按賦役全書上中下三等議徵歸入民糧項下造報

欽定大清會典事例卷一百六十八

戶部

田賦 勸課農桑 稽查種植

勸課農桑○

國初定。低田種稻黍稷。高阜種粟穀。○又定。縱馬食人田禾者。牧長牧副等。各鞭責。照所踐穀數追賠。○順治八年題准。農民力耕。甚賴牛力。有屠宰耕牛者。照律治罪。○十二年覆准。民間樹植以補耕獲。地方官加意勸課。如私伐他人樹株者。按律治罪。○十五年覆准。桑柘榆柳。

令民隨地種植。以資財用。○十七年覆准。設立里社。令民或二三十家。四五十家聚居。每遇農時。有死喪疾病者。協力耕助。○康熙十年覆准。民間農桑。令督撫嚴飭有司。加意督課。毋誤農時。毋廢桑麻。○十三年覆准。王以下不得因行獵蹂躪人田禾。違者。分別察議。每地六畝。追銀三兩。給償地主。○雍正元年

恩詔。直省府州縣衛所農民。果有勤於耕種。務本力作者。令該地方官不時加獎。以示鼓勵。○二年

諭。國家休養生息。數十年來。戶口日繁。而土地止有此

數。非率天下農民竭力耕耘。兼收倍穫。欲家室盈寧。必不可得。周官所載巡稼之官。不一而足。又有保介田畯。日在田間。皆為課農設也。今課農雖無專官。然自督撫以下。孰不兼此任。其各督率所司。悉心相勸。並不時咨訪疾苦。有絲毫妨於農業者。必為除去。仍於每鄉中擇一二老農之勤勞作苦者。優其獎賞。以示鼓勵。再舍旁田畔。以及荒山。不可耕種之處。度量土宜。種植樹木。桑柘可以飼蠶。棗栗可以佐食。柏桐可以資用。即榛楛雜木。亦足以供炊爨。其令有司課令種植。仍嚴禁非時之斧斤。牛羊之踐踏。姦徒之盜。

竊至孳養牲畜。如北方之羊。南方之彘。牧養如法。乳字以時。於生計不無裨益。所賴親民之官。委曲周詳。多方勸導。庶踴躍爭先。人力無遺。而地利可盡。不惟民生可厚。風俗亦可還淳。該督撫等各體朕惓惓愛民之意。實力奉行。○又

諭農民勤勞作苦。手胼足胝。以供租賦。養父母。育妻子。雖榮寵非其所慕。而獎賞要當有加。其令州縣有司。擇老農之勤勞儉樸。身無過犯者。歲舉一人。給以八品頂戴榮身。○又議准。督撫率府州縣官舉行勸農。春至勸耕。秋至勸斂。如有輕視民隱。不實力奉

行者。照例議處。○四年議准。直省設立

先農壇。藉田。每歲仲春亥日。督撫及府州縣衛所等官。率所屬耆老農夫。恭祭

先農之神。其耕藉。照九卿行九推之禮。○五年議准。直隸州縣閒曠之地。令相其土宜。各種新果。如各處河隄。栽種柳樹。陂塘淀澤。許種菱藕。蓄養魚鳧。其地宜桑麻者。尤當勤於栽種。令地方官察其勤惰。分別獎懲。○又

諭。修舉水利。種植樹木等事。原為利濟民生。必須詳諭勸導。令其鼓舞從事。不得繩之以法。如地方官因關

繫考成。督課嚴急。奉行不善。該管官即據實奏聞。○

又

諭。米穀為養命之寶。既賴之以生。則當加意愛惜。資之者衆。尤當隨時得節。各省地土。其不可以種植五穀之處。不妨種他物以取利。其可以種植五穀之處。則當視之如寶。勤加墾治。樹藝菽粟。安可舍本逐末。棄膏腴之沃壤。而變為果木之場。廢饗飧之恆產。以俾國贏餘之利手。至於煙葉一種。於人生日用毫無裨益。而種植必擇肥饒善地。尤為妨農之甚者也。惟在良有司諄切勸諭。俾小民醒悟。知稼穡為身命之所

關。非此不能生活。而其他皆不足恃。則羣情踴躍。皆盡力於南畝矣。朕生平愛惜米穀。每食之時。雖顆粒不肯拋棄。以朕玉食萬方。豈慮天庾之不給。而所以如此搏節愛惜者。實出於天性自然之敬慎。並不由於勉強。且以米穀乃

上天所賜。以生養萬民者。朕既為億萬生民計。不敢輕忽。

天貺。爾等紳衿百姓。獨不自為一身一家之計乎。若果加意愛惜。隨時搏節。則天必頻頻賜賚。長享盈寧之福。若恣情縱欲。暴殄天物。則必上干天怒。水旱災侵。

之事。皆所不免。又聞江西廣西地方。竟有以米穀飼養豚豕者。以

上天之所賜。小民終歲勤苦之所獲。為豢養物類之用。豈不干天和而輕民命乎。朕所以惓惓訓諭者。惟期天下之人。專務本業。以杜浮靡。愛惜物力。以圖久遠。思之思之。毋忽朕言。○八年

諭農事貴乎及時。二月土膏初動。三月即為播穀之期。直隸已得雨二次。何以遲延觀望。直待四月下旬。方始播種。儻小民怠惰偷安。為民父母者。則當開導勸課。使之踴躍趨事於南畝。又籽種牛力。或有不敷。則

當留心體察。設法相助。不致有後時之歎。况雨澤之
遲早有無。非人所能豫料。假若霖雨愆期。徬徨觀望。
則從前之急情。遲延。豈非小民自誤生計。自荒恆產
耶。或如西北寒冷之鄉。布穀不宜太早。又當一論。若
畿輔可以早種之地。又當甘雨既零之時。而乃袖手
逍遙。以待時雨之再沛。此皆愚民習於懶惰。而地方
有司。又不以民事為念。漠然不加董率之故。著該督
傳朕諭旨。通行申飭。儻再有牧民之官。輕視農事。不
實心化導。任百姓之悠悠忽忽。有誤播種之期者。必
從重議處。○乾隆二年

諭天下土地不為不廣。民人不為不衆。以今之民耕今之地。使皆盡力焉。則儲蓄有備。水旱無虞。乃民之逐末者多。而地之棄置者亦有之。縱云從事耕耘。而黍高稻下之宜。水耨火耕之異。南人尚多不諳。北民率置不講。此非牧民者之責。抑誰之責歟。朕欲驅天下之民。使皆盡力南畝。而其責則在督撫。牧令必身先化導。毋欲速以不達。毋繁擾而滋事。將使逐末者漸少。奢靡者知戒。蓄積者知勸。督撫即以此定牧令之短長。朕即以此課督撫之優劣。至北五省之民。於耕耘之術。更為疏略。其應如何勸戒百姓。或延訪南人

之習農者以教導之。牧令有能勸民墾種。一歲得穀若何。三歲所儲若何。視其多寡為激勸。非奇貪異酷極昏極庸者。毋輕率劾去。使久於其任。則與民相親。而勸課有成。著該部會同九卿詳悉定議。欽此。遵

旨議定。仿照周禮遂師之制。於鄉民之中。擇熟諳農務。素行勤儉。為閭閻信服者。每一州縣。量設數人。董率勸戒。地方官考績之法。必寬以歲月。庶久道化成。而無欲速不達之弊。如勸戒有方。境內地闢民勤。穀豐物阜。該督撫於三年之後。據實題報。官則交部議敘。老農量加獎賞。儻有教導

無方。強勒滋擾。以及希圖獎賞。捏詞妄報者。指

名題叅。○又

諭自古致治以養民為本。而養民之道。必使興利防患。水旱無虞。方能使蓋藏充裕。緩急可資。是以川澤陂塘溝渠隄岸。凡有關於農事。務籌畫於平時。期蓄洩得宜。潦則有疏導之力。旱則資灌溉之利。非諉之天時。豐歉之適然。而以臨時拯恤為可塞責也。朕御極以來。宵旰憂勤。惟小民之依。是咨是詢。前後諭旨。諄復再三。但化導自在有司。而督率則由大吏。該督撫有司。務體朕恫瘝乃身之意。刻刻以民生利賴為先。

圖一切水旱事宜。悉心講究。應行修舉者。即行修舉。或勸導百姓自為經理。如工程重大。應動用帑項者。即行奏聞。妥協辦理。興利去害。俾旱潦不侵。倉箱有慶。以副朕惠愛黎元至意。○三年

諭據河南巡撫奏稱種樹為天地自然之利。臣經欽奉諭旨。隨飭地方官多方勸諭。桑柘榆柳棗梨桃杏。各就土性所宜。隨處種植。一年之內。成活之樹。共計百九十一萬有餘等語。朕御極以來。軫念民依。於勸農教稼之外。更令地方有司化導小民。時勤樹植。以收地利。以益民生。今覽該撫所奏。是豫省一年之內。已

種樹百餘萬之多。朕思中州接壤畿輔。為南北往來之衝。並未聞有教民種植滋事繁擾之處。安見豫省之法。不可仿行於他省耶。至五穀乃民命所關。國家設立倉儲。原以濟小民之緩急。但倉儲有限。而人數繁多。是在督撫大員。董率州縣官。勤勤懇懇。勸勉化導。俾百姓各盡力於南畝。野無曠土。戶無游民。縱不能如古人耕九餘三。亦必令有所儲蓄。以備不虞。則克盡牧民之本圖矣。儻襲取虛文。不求實政。或且刑驅勢迫。使閭閻未受蓋藏之益。而已受煩苛之擾。此又國法之所不貸者。可將此傳諭各督撫善體朕心。

勉力為之。○七年

論周禮太宰以九職任萬民。一曰三農生九穀。二曰園
圃毓草木。三曰虞衡作山澤之材。四曰藪牧養蕃鳥
獸。其為天下萬世籌贍足之計者。不獨以農事為先
務。而兼修園圃虞衡藪牧之政。故因地之利。任園以
樹事。任牧以畜事。任衡以山事。任虞以澤事。使山林
川澤邱陵之民。得享山林川澤邱陵之利。夫制田里。
教樹畜。岐周之善政。管敬仲亦云。積於不涸之倉者。
務五穀也。藏於不竭之府者。養桑麻育六畜也。如采
園圃虞衡藪牧之職。以次修舉。於民生日用。不無裨

益。國家承平日久。生齒日繁。凡資生養贍之源。不可不為急講。夫小民趨利如鶩。亦豈甘為惰窳。舉山林川澤天地自然之利。委為棄壤哉。良以疏闢之初。豪強既羣起而爭。管業之後。姦民又多方戕賊。地方有司。每視為資產細故。不為申理。此所以寧荒其業耳。督撫大吏。身任地方。所當因地制宜。及時經理。其已經開墾成產者。加意保護。或荒墟榛壤。以及積水所匯。有可疏闢者。多方相度籌畫。俾地無遺利。民無餘力。以成經久優裕之良法。至於竭澤焚林。並山澤樹畜一切侵盜等事。應行禁飭申理之處。轉飭地方官

實力奉行。該督撫不時稽查。務令從容辦理。以期實效。毋致絲毫滋擾。尤毋得日久因循。以仰副朕惠養斯民之至意。○八年議准。民間種煙一事。廢可耕之地。營無益以妨農功。向來原有例禁。且種煙之地。多係肥饒。自應通行禁止。惟城堡以內閒隙之地。可以聽其種植。城外則近城奇零菜園。願分種煙者。亦可不示禁。其野外山隰土田阡陌相連。宜於蔬穀之處。一概不許種煙。凡向來種煙之地。應令改種蔬穀。○又

諭朕維養民之本。莫要於務農。州縣考成。固應用是為

殿最。而向來功令不專以此課吏者。因其事甚樸。無可炫長。其迹似迂。驟難見效。又或上司之查勘難周。有司之條教易飾。不似催科聽斷捕盜等事之顯而有據也。督撫察吏。每於此等本計。轉視為老生常談。漢馬不甚加意。以致州縣之吏。趨承風旨。專以簿書期會為先。而農事反居其後。不知為治之道。本舉而末自隨之。如果南畝西疇。人無餘力。于耜舉趾。日無暇時。則心志自多溷樸。風俗自鮮。蠶陵人知急公。而閭閻無待追呼矣。人知畏法。而盜賊因以浸息矣。本計既端。末事亦次第就理。如此則州縣之考成。似疏

而實密。即督撫之查覈。可簡而不煩。日計不足。月計有餘。民生大有裨益。即治道亦漸致邳隆。若夫朝令夕申。意非不美。束縛馳驟。適以擾民。為督撫者。當善體朕意。毋視為具文。毋事於塗飾。誠以實心化導。其屬。俾屬吏亦實心勸課其民。庶幾野無游惰之風。家有蓋藏之樂。朕以此訓示督撫。業已至再至三。不啻耳提面命。今復降此諭。實願與天下共敦本計。故不厭其言之重。而辭之複也。各省督撫。其共勉之。○九年題准。直隸天津河間各屬。土性宜棗。種植最多。深冀亦產桃梨。至於榆柳楊樹之類。河窪鹼

地各有所宜。令民閒於邨頭屋角。地畝四至。隨宜廣種。始足以資利益。如有旗地。可種樹木之處。廣令該管各官。勸諭旗人。亦可多為栽種。

二十三年

諭。吉亥藉畝。所重勸農。黛耜青箱。畚鍤義笠。咸寓知民疾苦之意。而設棚懸絲。以庇風雨。義無取焉。吾民涼雨犁而赤日耘。雖襍種之尚艱。豈炎溼之能避。且片時用而過期撤。所費不啻數百金。是中人數十家之產也。其飭除之。○四十一年議准。民間農桑。責在有司。勸課果著成績。三年後准予議敘。不實心者

以溺職論。其勤耕務本之農民。該管官時加獎勵。每一州縣。量設老農數人。以為董率。每三年查舉老農之勤勞儉樸無過犯者一人。給予八品頂戴。以榮其身。濫舉者議處。○又

諭江南山東河南等省所屬濱河地畝。荒廢頗多。今已逐經涸出。正應及早墾種。其未經涸出者。更宜加意設法疏洩。及時補種。以收地利。乘此民力稍裕之時。地方有司多方勸諭。務使野無曠土。方為無忝厥職。

○五十八年

諭朕恭閱

聖祖仁皇帝實錄。康熙四十九年。民數二千三百三十
一萬二千二百餘名口。因查上年各省奏報民數。共
三萬七百四十六萬七千二百餘名口。較之康熙年
間。計增入十五倍有奇。我國家承

天眷佑。百餘年太平天下。化澤涵濡。休養生息。承平日
久。版籍益增。天下戶口之數。較昔多至十餘倍。以一
人耕種而供十數人之食。蓋藏已不能如前充裕。且
民戶既日益繁多。則廬舍所占田土。不啻倍蓰。生之
者寡。食之者衆。於閭閻生計。誠有關繫。若再因歲時
屢豐。粒米狼戾。民情游惰。田畝荒蕪。勢必致日食不

繼。益形拮据。朕甚愛之。猶幸朕臨御以來。闢土開疆。幅員日廓。小民皆得開墾邊外地土。藉以暫謀口食。然為之計及久遠。終須野無曠土。家有贏糧。方可戶慶盈寧。收耕九餘三之效。各省督撫及有牧民之責者。務當隨時勸諭。剴切化導。俾皆儉樸成風。服勤稼穡。惜物力而盡地利。共享昇平之福。毋得相競奢靡。習於怠惰。用副朕愛養黎元。諄諄教誡至意。○五十

九年

諭塔爾巴哈台察哈爾人等。生計維艱。無產業牲畜者多。今雖稍為耕種地畝。設無力接續短欠。置立牲畜。

究屬不能豐足。著施恩於彼處房地租銀內。每年賞銀七百七十餘兩。以為接續短欠。置立牲畜。以示憐恤。察哈爾臣僕之意。○道光三年

諭毛式邨奏疏消積潦以衛民生一摺。本年直隸雨水較多。災區甚廣。現當水勢漸次消落。亟應乘時疏洩。以利農田。著蔣攸銛飭令各屬。於查辦賑戶之便。確估各鄉邨地方。將涸出地畝。勸令趕種秋麥。毋致失時。至低窪處所。當於空隙之處。相度地勢。勸諭各業戶挑溝宣洩。同力疏消。俾水有所歸。即此時未能播種。來年尚可補種春麥。若因循坐待。一至冬令冰寒。

更難施力。春融後又復積潦沮洳。無從藝植。於籌備
民食。殊無裨益。該督務飭知各州縣。總須體察情形。
妥為晚諭。斷不可遇事張皇。轉滋擾累也。○十七年
奏准。山東登萊青三府屬多山。其平行處間有
種桑。而飼養野蠶。別有一種柎樺樹。亦名柎葉。
將蠶放置樹間。收繭取絲。獲利甚廣。其餘各府
州民向勤蠶桑。現已飭廣行栽植。○二十三年
諭。納爾經額奏。遼查直隸地方。難以興舉屯政。水田一
摺。據稱天津至山海關一帶。戶口殷繁。地無遺利。其
無人開墾之處。乃沿海鹼灘。湖水鹹漬。不足以資灌

溉屯田之法。勢難舉行。至全省水利之說。歷經試鑿水田。屢興屢廢。總由南北水土異宜。民多未便。而開源疏泊建牖修塘。一切工費。皆需重帑。未敢以有用之項。輕議試行。惟地高慮旱。地窪慮潦。但在地方官於境內溝洫。及時疏通。以期有備。或開鑿井泉。以車戽水。亦足裨益田功等語。所奏自係實在情形。均著照議辦理。至省南民間用水車汲井溉田。需費不多。最為利便。現據該督照式製造。發交各府州。著即諄飭各屬。廣為勸導。實力奉行。如有民間不知此法。即於頒發式樣後。勸令按井製車。試行灌溉。其始未免

惜費憚勞。如行之有效。互相傳造。於農功必有裨益。用副朕敦本重農之至意。○同治二年

諭各省州縣。被賊盤踞多年。其土著之賊。及勾結入夥者。所有逆產。自宜查明入官。至附近賊匪邨莊淪為賊產者。亦應勸明給還原主。以恤流氓。著各該督撫於新復各處。督飭各該州縣。確切查明實在逆產入官。其荒廢地畝有原業主者。即行給領。尚未查得業主者。即著暫行造冊登記。將此兩項地畝。仿照山東召墾章程。分別酌給難民降衆。量為耕種。以資衣食。俟業主續歸。再行給還。所有一切事宜。並著各該督

撫妥議章程。慎選廉明守令。妥為經理。不准假手吏胥。致滋紛擾。抑勒諸弊。○八年

諭軍興以來。人民流徙。田地荒蕪。其現經克復地方。小民亟宜復業。乃田疇或占於豪強。猝難認領。舊賦或虧於官長。恐迫追呼。種種困苦情形。殊堪矜憫。著各直省督撫。於從前被兵現經收復地方。慎選賢良牧令。責令加意拊循。流亡有歸業者。為之清還田產。緩其逋租。假以籽種之貲。俾有歸農之樂。務使兵燹餘生。各安舊業。以恤民艱。而固根本。

稽查種植。○道光十九年

諭。深章鉅奏查禁栽種罌粟章程一摺。內地栽種罌粟。煎熬煙土。必應逐年實力稽查。方足以除積弊。據該撫議立章程具奏。著照所請。嗣後每年冬初。先由道府頒發嚴禁告示。並令各府廳州縣仿照保甲按戶編查。給予門牌。註明並無栽種罌粟煎熬販賣之人。取具十家連環保結。責成保鄰墟長隨時稽查。如十家內有違例私種。或租給客民栽種。著准其首告。給予獎賞。僮知情不首。即著將九家並地保墟長一併究治。每年限二月八月查辦兩次。由該廳州縣加具印結。齎送道府。該管府道或親身巡查。或委員抽查。

加結申報。儻查辦不實。即著分別嚴揭特參。獲犯從重懲辦。並著該撫及藩臬兩司。遇有因公出省之便。隨時認真查察。總期實心奉行。除弊務盡。斷不可稍為鬆懈。仍致有名無實。○同治四年

諭

沈桂芬奏請嚴禁種植罌粟等語。三農畝畝服勞以生九穀。自宜專務稼穡。藉為仰事俯畜之資。乃近年以來。山西人民多以種植罌粟為業。始而山坡地角。偶爾試栽。繼且沃壤腴田。種植殆徧。遂致產米愈少。糧價增昂。設遇收成歉薄之年。民間儲蓄毫無。奚由得食。著沈桂芬即行刊刻告示。將種植罌粟嚴行禁

止。並著各直省督撫通飭所屬。一律嚴禁。俾小民服田力穡。共慶有秋。庶豐年有倉箱之積。歉歲無匱乏之虞。於國計民生。均有裨益。○十一年

諭。民間栽種罌粟。本干例禁。現在陝甘地方。瘡痍甫復。耕墾無多。民倉軍糧。猶虞不繼。亟應講求農務。以冀豐盈。即著左宗棠嚴飭各地方官。申明定例。悉行禁止。如有民間貪利私自種植者。即於根苗初發時。飭令盡行拔除。並嚴禁丁差。不准藉端擾索。儻有不肖官吏。仍敢故違例禁。按畝收費。即著照枉法贓。嚴叅治罪。其煙土來自外省者。著一律嚴查。不准入境。以

期淨絕根株。各直省亦宜一體嚴禁。有犯必懲。毋使有妨民食。○十三年

諭栽種罌粟。例禁甚嚴。據袁承業奏稱山西大同汾州代州尚知禁約。其餘州縣多未遵行等語。著山西巡撫分別飭屬確實勘明。即行剴切曉諭。嚴禁栽種。此等惡習。恐他省亦所不免。並著各直省督撫通飭所屬。隨時認真稽察。無論已種未種。一律嚴行申禁。○

光緒七年

諭栽種罌粟之害。有妨民食。始於甘肅。延及陝西山西。近復江蘇河南山東等省。亦有漸行栽種者。小

民貪利忘害。僅顧目前。勢必至膏腴之產。盡種無用之物。於百姓生計。大有闕礙。前曾嚴行申禁。著各該督撫。迅飭各地方官。再行剴切曉諭。一體禁止。儻有不法匪徒。故意抗違。即治以應得之罪。各州縣官。如不能認真辦理。任令吏胥飾詞蒙蔽。並著各該管上司。從嚴叅辦。毋稍徇隱。○八年奏准山西地方所種罌粟。一律禁止。